



UKA 2015/65  
UKA 2015/90  
Justus Hansen

**Illersornissamut isumaqatigiissutip 1951-imeersup kingornagullu ilassuteqartinneqartup qanoq isumaqatigiinniutigeqqinneqarsinnaaneranut kaammattuutunik saqqummiussisussamik Kalaallit/danskit allaffissornikkut ataatsimiititaliaannik pilersitsinissaq siunertaralugu danskit naalakkersuisuinut saaffiginneqquullugit Naalakkersuisut peqquneqarnissaannik Inatsisartut aalajangiiffigisassaattut siunnersuut, taamaalilluni illersornissamut isumaqatigiissutit aammalu amerikamiut Kalaallit Nunaanni sakkutooqarnerat Kalaallit Nunaannut iluaqutaanerusinnaaqqullugit.**  
(Inatsisartunut ilaasortaq Hans Enoksen, Partii Naleraq)  
(Siullermeernera)

**Illersornissamut isumaqatigiissut 1951-meersaq tamassumalu kingorna tapiliussatut isumaqatigiissutit tassunga attuumasut nalilersuineramik Inatsisartunut (imaluunniit tatigeqatigiinneq pillugu isertuussineq pisariaqassappat Nunanut Allanut Sillimaniarnermullu Ataatsimiititaliamut) UKA2016-imi saqqummiussinissaannik Naalakkersuisut peqquneqarnissaannik Inatsisartut aalajangiiffigisassatut siunnersuut. Naliliinermi isumaqatigiissummi naalakkersuinikkut aningaasaqarnikkullu akuusut nunatsinnut qanoq pingaaruteqarneri nalilersorneqassapput, tamassumalu saniatigut Naalagaaffeqatigiinnerup iluani Namminersorlutik Oqartussat isumaqatigiissut malillugu pisinnaatitaaffiisa piginnaaneqarnerisalu erseqqissarneqarneri ilaatinneqassallutik.**  
(Inatsisartunut ilaasortaq Sara Olsvig, Inuit Ataqtigiiit)  
(Siullermeernera)

Demokraatini naligninnaasumik nuannaarutigaa nunap matumap USA isigisinnaammagu ilitut. Toqqissisimanarpoq ilisimallugu nunarsuarmi sakkutooqarnikkut naalagaaffissuit nukittunersaat iligigipput.

Kisianni pingaaruteqarpoq ikinngutit allaat isumaqatigiissuteqarfiginissaat. Amerikamiut ilisimassavaat pisinnaatitaaffitik pisussaaffitillu aamma uangut pisinnaatitaaffigut pisussaaffigullu ilisimassavagut. Nunarsuarmi allanngoriartupiloortumi pingaaruteqarpoq nakkutigiuassallugu arlaannik ilusarsisassaqaqarnersoq allanngortitassaqaqarnersorluunniit suleqatigiinneq tamanut pitsaanerpaamik kinguneqassappat. Kingullermik illersornissamut isumaqatigiissut allanngortinneqarpoq 2004-mi, USA-p Danmarkillu isumaqatigiissutigimmassuk Igalu-isumaqatigiissummik taagorneqartoq.

Demokraatini tamanna tunngavigalugu siunnersuuteqartut tamaasa isumaqatigaagut oqarmata ukiut qulit sinnilaarlugit ingerlareermata pisariaqartoq illersornissamut isumaqatigiissutip sukumiisumik misissoqqinneqarnissaa.



Isumaqarpugilli suliasat iluamik tullerriaarneqassasut sapinngisamik isumaqatigiinniarnerni tunngavissarissaarumalluta. Partii Naleqqap siunnersuutigaa ataatsimiititaliamik pilersitsisoqassasoq innersuussisussanik qanoq iliorlu isumaqatigiissut isumaqatigiinniutigeqqinneqarsinnaanersoq kiisalu Inuit Ataqatigiit siunnersuutaanni Naalakkersuisut qinnuigineqarput maannakkut illersornissakkut isumaqatigiissummut nalilersuummik saqqummiussissasut. Demokraatini isumaqarpugut aallaqqaammut nalilersuisoqartariaqartoq taavalu paasisat naapertorlugit nalilersuisoqassasoq suliaq qanoq ingerlateqqinneqassanersoq.

Tamanna tunngavigalugu inassutigaarput Inuit Ataqatigiit siunnersuutaat (immikkoortoq 90) Nunanut allanut Sillimanissamullu Ataatsimiititaliami suliareqqinneqassasoq. Partii Naleqqap siunnersuutaa (immikkoortoq 65) inassutigaarput itigartinneqassasoq.